

Estilo, Salud, Moda y Beyeza

Hypn@tiSA

Skirbi pa: Eddy Oduber - Hypnotherapista Certifica - hypnosis@arubamet.com

PADÚ

Como mucha mi por corda mi tata ta manda mi coy un cuchara di sopi den cushina p'e por toca ariba su bongo hunto cu Dr. Dennert ariba maraca y mi mama ariba raspa, compañaando Dr. Chan ariba guitarra y Padú ariba e piano. Nos tur morto cansa despues di a bringa pa carga e piano for di den sala pa e patio patras despues cu mi tata a crea cualkier excuus pa un "tocá".

Mi a conoce Padú como pianista y cantante y ta hopi aña despues mi a realisa cu Padú tin hopi otro cualidadnan cu mi no ta sa di dje. Padú ta un persona polyfacetico y ademas di a composita mas cu 500 cantica, e la pinta mas cu 300 pintura. Tempo mi tabata mucha un di su pinturanan tabata colga den comedor di mi wela (awo e ta na cas di mi mama) y oranan largo mi tabata wak e pintura ta purba imagina ta kico JC LAMPE 1936 lo por tabata pensa ora e la pint'e. Esaki sin sa cu e tabata e mesun persona cu na cas tabata crea asina un tremendo ambiente ariba piano. Ademas cu Padú a publica 3 buki poco hende sa cu Padú ta un hypnotista Certifica. Na 1966 (casi 50 aña pasa) Padú a ricibi su certificado di "Certified Hypno-Technician" di "Association to Advance Ethical Hypnosis" na New Jersey na Merca.

Algun dia pasa mi ta tin e oportunidad pa hunto cu algun amigo bishita Padú na su cas. E murayanan yen di certificado, poesia, reconocimiento, pintura, y potretnan di dje hunto cu masha hopi personahe famoso silenciosamente ta conta e storia impresionante di Padú su trayectoria di exito den bida.

Tur esten cu Ced Ríde y Padú tabata canta "Abo So" compaña ariba piano pa Padú su yiu muhe Vivian, mi a cuminsa lesa un di e bukinan di Padú yama "Harmoniology" (un terminología cu Padú mes a crea pa identifica harmonia interno.) Figura bo cu ya caba na 1975, prome cu "The Secret", Padú ya a skirbi ariba "The Law of Cause and Effect." Den e buki aki Padú ta describi loke e ta considera di ta un exito den bida.

Mi a sinta un rato keto y a pensa ariba kico nos mundo di awe ta considera ta exitoso. Nos ta pensa ariba Steve Jobs, John F. Kennedy y otro grandi nan pero no ta para keto un rato y pensa ta basa ariba kico nos ta midi exito.

Exito ta gana hopi placa y tin hopi cos material? E dos personanan mas rico na mundo, Bill Gates y Warren Buffett, ta regalando e gran mayoria di nan placa na instancianan caritativo!

Exito ta di ser reconoci pa hopi hende? Robin Williams un artista hopi famoso y renombra a comete suicidio!

Por ta cu exito ta liderazgo? Den e buki di Steve Jobs su trahadonan ta identific'e come un di e hefe nan mas horibel cu ta sisti.

Mi a sinta pensa cu exito ta loke Padú ta describi den e buki asina cla y cual e ta bib'e asina perfecto. Bo pensamentonan mester ta semper positivo y constructivo. Mi ta quote Padú su buki: "The rule is to keep the mind always filled with pleasant, constructive, wholesome thoughts."

Den e mesun buki Harmoniology e ta splica cu nos enemigo mas grandi ta pa pensa ariba cosnan negativo y destructivo y cu nos tin cu pensa bon ariba kico nos ta pensa. Nos tin cu evita pensamentonan negativo y destructivo manera miedo, envidia, odio, rencor y rabia. Pa nos por ta exitoso nos tin cu enfoca nos pensamentonan ariba cosnan positivo: perdona, salud, pas, harmonia, felicidad y particularmente amor.

Lesando e buki mi a realisa cu exito den bida ta hopi facil pa midi. E no ta placa, e no ta fama, e no ta liderazgo ni nada otro. Exito ta harmonia den nos pensamiento. Ta exitoso ta nada mas cu por controla bo pensamiento y enfoca pa e gran mayoria di bo tempo bo pensa ariba cosnan creativo, positivo y constructivo. Padú ta e ehempel bibo di esaki. Cu Dios su poder, otro luna Padú ta cumpli 96 aña. Pabien Padú, cu Dios duna bo hopi mas aña di bida y salud, pabien di ta exitoso den bida.

Abo y ami tambe por ta exitoso den bida si nos enfoca nos pensamiento y guia nan pa nan ta creativo, positivo y constructivo. Esaki lo haci nos biba harmonioso y exitoso.